

摘藻堂四庫全書薈要

集部

欽定四庫全書薈要

集部

施註蘇詩卷一
二



詳校官助教臣常循

欽定四庫全書蒼要卷一萬四千九百五十二

集部

施註蘇詩卷一

宋蘇軾撰

宋施元之註

武進邵長蘅刪補



詩四十七首

起嘉祐辛丑十二月赴鳳翔任盡
壬寅在鳳翔作 施註缺今補

辛丑十一月十九日既與子由別於鄭州西門
之外馬上賦詩一篇寄之

不飲胡為醉兀兀此心已逐歸鞍發歸人猶自念庭闈

今我何以慰寂寞登高回首坡隴隔惟見烏帽出復沒
苦寒念爾衣裘薄獨騎瘦馬踏殘月路人行歌居人樂
僮僕怪我苦悽惻亦知人生要有別但恐歲月去飄忽
寒燈相對記疇昔夜雨何時聽蕭瑟君知此意不可忘

慎勿苦愛高官職

公自注嘗有夜雨對牀之言故云爾

杜詩烏帽塵拂青螺粟韋應物與元常全真二生詩那知風雨夜復此對牀眠王注子由與先生在懷遠驛嘗讀韋詩至此句惻然感之乃相約早退共為閒居之樂其後子由與先生彭城相會有詩曰逍遙堂後千尋木長送中宵風雨聲悞喜對牀尋舊約不知漂泊在彭城先生在東府雨中作示子由詩有曰對牀定悠悠夜雨

今蕭瑟蓋皆感
歎追舊之言也

和子由澠池懷舊

漢書弘農郡澠池縣注景
帝中二年初徙萬家為縣

人生到處知何似，應似飛鴻踏雪泥。
泥上偶然留指爪，鴻飛那復計東西。
老僧已死成新塔，壞壁無由見舊題。
往日崎嶇還記否，路長人困蹇驢嘶。

公自注往歲馬死於二陵騎驢至澠池

賈誼弔屈原賦騰駕罷牛驂蹇驢兮杜
詩東家蹇驢許借我泥滑不敢騎朝天

次韻和劉京兆石林亭之作石本唐苑中物散

流民間劉購得之

京兆府即長安也劉京兆乃劉敞字原父

都城日荒廢往事不可還唯餘故苑石漂散向

一作尚

人間公來始購蓄不憚道里艱忽從塵埃中來對冰
雪顏瘦骨拔凜凜蒼根激潺潺唐人唯竒章好石古
莫攀盡令屬牛氏刻鑿紛紛嗟此本何常聚散實
循環人失亦人得要不出區寰君看劉李末不能保
河關況此百株石鴻毛於泰山但當對石飲萬事付

等閒

河圖括地象地以石為骨白樂天太湖石記今丞相竒
章公嗜石於此物獨不謙讓東第南墅列而置之以甲
乙丙丁品之各刻於石陰曰牛氏石甲之上丙之中乙
之下按竒章公牛僧孺也家語楚共王出遊亡其烏號
之弓左右請求之王曰止也楚人失弓楚人得之又何
求焉孔子聞之曰惜乎其不廣也宜曰人遺弓人得之
而已何必楚也王注劉指漢李指唐也史記魏王豹至
國即絕河關司馬遷與任安書死有重於泰山或輕於
鴻毛

壬寅二月有詔令郡吏分往屬縣減決囚禁自
十三日受命出府至寶雞號都整屋四縣既畢
事因朝謁太平宮而宿於南谿谿堂遂竝南山

而西至樓觀大秦寺延生觀仙游潭十九日乃
歸作詩五百言以記凡所經歷者寄子由

遠人罹水旱王命釋俘囚分縣傳明詔循山得勝遊蕭

條初出郭曠蕩實消憂薄暮來孤鎮登臨憶武侯崢嶸

依絕壁蒼茫瞰奔流半夜人啼急橫空火氣浮天遙殊

不辨風急已難收曉入陳倉縣猶餘賣酒樓煙煤已狼

藉吏卒尚呀咻公自注十三日宿武城鎮即俗所謂石
鼻寨也云孔明所築是夜二鼓寶雞火

作相去三十里雞嶺雲霞古龍宮殿宇幽公自注縣有
雞爪峰龍宮
而見於武城

寺南山連大散歸客走音吾州欲往安能遂將還為少

留回趨西虢道卻渡小河洲聞道磻溪石猶存渭水頭

蒼崖雖有迹大釣本無鉤公自注十四日自寶雞行至磻溪石在縣東南

十八里猶有投竿晚餌兩膝所著之處東去過郿塢孤城象漢劉公自注十五日

至郿縣縣有董卓城象長安俗謂之小長安誰言董公健竟復伍孚讎白刃

俄生肘黃金謾似丘平生聞太白一見駐行駟鼓角誰

能試風雷果致不巖崖已竒絕冰雪更凋鏤春早憂無

麥山靈喜有秋蛟龍懶方睡餅罐小容偷公自注是日晚自郿起至

青秋鎮宿道過太白山相傳云軍行鳴鼓角過山下輒致雷雨山上有湫甚靈以今歲旱方議取之

二曲

林泉勝三川氣象侔近山麩麥早臨水竹篁修

公自注十六日

至蓋屋以近山地美氣候殊早縣有官竹園十數里不絕

先帝膺符命行宮畫冕旒

侍臣簪武弁女樂抱箜篌祕殿開金鎖神人控玉蚪黑

衣橫巨劍被髮凜雙眸

公自注十七日寒食自蓋屋東南行二十餘里朝謁太平宮二

聖御容此宮乃太宗皇帝時有神降於道士張守真以告受命之符所為立也神封翊聖將軍有殿

邂逅

逢佳士相將弄綵舟投篙披綠苻濯足亂清溝晚宿南

谿上森如水國秋遶湖栽翠密終夜響颼颼

公自注是日與監宮

張杲之汎舟南谿
遂留宿于谿堂

冒曉窮幽邃操戈畏炳彪

公自注十日循終

南而西縣尉以甲卒見送
或云近官竹園往往有虎

尹生猶有宅老氏舊停輶問

道遺蹤在登仙往事悠馭風歸汗漫閱世似蜉蝣羽客

知人意瑤琴繫馬鞦不辭山寺遠來作鹿鳴呦帝子傳

聞李崑堂髣像緹輕風幃幔卷落日髻鬟愁入谷

音驚浴

蒙密登坡費挽樓亂峰巉似槩一水澹如油中使何年

到金龍自古投千重橫翠石百丈見游鯨

音紬

最愛泉鳴

洞初嘗雪入喉滿鉞雖可致洗耳歎無由

公自注是日
游崇聖觀俗

所謂樓觀也乃尹喜舊宅山脚有授經臺尚在遂與張
杲之同至大秦寺早食而別有太平宮道士趙宗有抱
琴見送至寺作鹿鳴之引乃去又西至延生觀觀後上
小山有唐玉真公主修道之遗迹下山而西行十數里
南入黑水谷谷中有潭名仙游潭上有寺三倚峻峰面
清溪樹林深翠怪石不可勝數潭水以繩縋石數百尺
不得其底以瓦礫投之翔揚徐下食頃乃不見其清澈
如此遂宿於中興寺寺中有玉女洞洞中有飛泉甚甘
明日以泉二甌歸至
鄙又明日乃至府 忽憶尋蟆培方冬脫鹿裘山川良

甚似水石亦堪儔惟有泉傍飲無人自獻酬

公自注昔與子由游

蟆培時方冬洞中
溫溫如二三月

楚辭遠游下崢嶸而無地兮上寥廓而無天注崢嶸深
遠貌文選刻削崢嶸王注蒼茫字古人用皆平聲先生

用作仄聲蒼字廣韻音麤朗而茫字上聲之莽去聲之
澆皆不收不知先生用之所出地志載三秦記陳倉以
山得名山有石雞與山雞不別趙高燒山山雞飛去而
石雞不去晨鳴山頭聞三十里蓋玉雞也唐至德二載
更名寶雞史記封禪書秦文公獲若石云於陳倉北阪
城祠之其神來常以夜光輝若流星從東南來集於祠
城則若雄雞其聲殷云野雞夜雉以一牢祠命曰陳寶
按雞爪峰蓋以此得名王注大散關秦蜀通途又西虢
虢叔所封平王東遷虢徙上陽故謂之西虢後漢董卓
傳築塢於郿高厚七丈虢曰萬歲塢又塢中珍藏有金
二三萬斤銀八九萬斤錦綺奇玩積如丘山袁紹傳卓
議廢立紹勃然曰天下健者何必董公又卓傳越騎校
尉伍孚忿卓兇毒懷珮刀刺之不中左右執孚孚大言
曰恨不得磔裂姦賊於都市又王允與呂布謀誅卓李
肅以戰刺之衷甲不入卓驚呼呂布何在布曰有詔討
賊遂殺卓三十六洞天記第十一太白山洞周回五百

里三秦謠武功太白去天三百選賦木不凋鍤王注偷
字韻蓋方言取龍水謂之偷湫也西京賦右極蓋屋并
卷鄴鄂之下李善注蓋屋山名蓋音周屋音質寰宇記
山曲曰蓋水曲曰屋故云二曲王注古謂伊洛河為三
川唐以劍南東西及山南西道為三川釋名塋篚師延
所作風俗通武帝禱祀太一后土令樂人侯調作坎侯
言聲坎坎應節也因其姓號坎侯蘇林注作塋篚李賀
塋篚引二十三絲動紫皇司馬相如賦乘鏤象六玉蚪
劉焘曰翊聖像皆被髮跣足仗劍授龍相承舊矣廣雅
小風曰颼涼風曰颼周易大人虎變其文炳也說文虎
文曰彪史記老莊傳老子見周之衰乃遂去至關關令
尹喜曰子將隱矣彊為我著書乃著書言道德之意五
千餘言而去列子馭風而行淮南子有若士者謂盧敖
曰子處矣吾與汗漫期于九垓之上詩曹風蜉蝣之羽
毛傳渠略也朝生夕死王注帝子唐玉真公主睿宗之
女始封長昌縣主天寶三年上言妾高宗之孫睿宗之

女陛下之女弟於天下不為賤何必名係主號資湯沐然後為貴請入數百家之產延十年之命帝許之與金仙公主皆為道士青城山記玉真公主肅宗之姑也築室丈人觀玉真金仙二宮主真容見在女仙列傳西王母姓緄其所居有玄碧之堂唐王建溫門山詩曉入溫門山羣峰亂如戟白樂天詩噴時千點雨澄處一泓油東齋記事道家有金龍玉簡學士院撰文具一歲中齋醮投于名山洞府金龍以銅制玉簡以階石制莊子與惠子游於濠上儵魚出遊沈約詩百丈見游鱗唐張又新水記峽州扇子峽石中突而洩水獨清冷石狀如龜頭俗謂蝦蟆石其水煎茶為第一

太白山下早行至橫渠鎮書崇壽院壁

馬上續殘夢不知朝日昇
亂山橫翠幃落月澹孤燈
奔走煩郵吏安閒愧老僧
再游應眷眷聊亦記吾曾

留題延生觀後山上小堂

王注觀後上小山有堂是唐玉真公主修

道遺迹本朝端拱元年奉勅賜此額

溪山愈好意無厭
上到巉巉第幾尖
深谷野禽毛羽怪
上方仙子鬢眉纖
不慙弄玉騎丹鳳
應逐嫦娥駕老蟾
澗草巖花自無主
晚來胡蝶入疎簾

列仙傳蕭史善吹簫秦穆公以女弄玉妻焉遂教弄玉吹簫作鳳鳴一旦弄玉乘鳳蕭史乘龍昇天而去淮南子弄得不死之藥於西王母姮娥竊之奔月姮娥羿妻也乾鑿度蟾蜍體就穴鼻始明注穴鼻兔也

留題仙遊潭中興寺東有玉女洞洞南有馬融

讀書石室過潭而南山石益竒潭上有橋畏其

嶮不敢渡

終南圖經讀書臺
在縣城西一百步

清潭百尺皎無泥山木陰陰谷鳥嘯蜀客曾遊明月峽
秦人今在武陵溪獨攀書室窺巖竇還訪仙姝款石闥
猶有愛山心未至不將雙腳踏飛梯

王注明月峽在古巴郡今在忠涪二州之境石壁有圓
孔形如滿月蜀客則先生自謂武陵溪用桃源漁人事
詳第六卷風水洞詩注後漢馬融傳融扶風茂陵人
京兆摯恂以儒術教授隱於南山之陰融從其游學

石鼻城

注見前

平時戰國今無在陌上征夫自不閒北客初來試新險
蜀人從此送殘山獨穿暗月朦朧裏愁渡奔河蒼茫間
漸入西南風景變道邊修竹水潺潺

王注戰國指蜀魏也諸葛亮築此城以拒郝昭

礮溪石

注見前

墨突不暇黔孔席未嘗煖安知渭上叟跪石留雙胛一
朝嬰世故辛苦平多難亦欲就安眠旅人譏客懶

淮南子墨子無黔突孔子無煖席史記齊世家武王封師尚父於齊營丘東就國道宿行遲逆旅之人曰吾聞

時難得而易失客寢甚安殆非就國者也太公聞之夜衣而行黎明至國

郿塢

注見前

衣中甲厚行何懼塢裏金多退足憑畢竟英雄誰得似
臍脂自照不須燈

後漢董卓傳尸卓於市天時始熱卓素充肥脂流於地守尸吏然火置卓臍中光明達曙如是積日

樓觀

公自注秦始皇立老子廟於觀南晉惠始修此觀

門前古碣卧斜陽閱世如流事可傷長有幽人悲晉惠
強修遺廟學秦皇丹砂久窖井水赤白朮誰燒厨竈香

聞道神仙亦相過只疑田叟是庚桑

抱朴子臨汜縣有廖氏世老壽後移居子孫輒殘折他人居其故宅復累世壽疑其井水赤乃掘井左右得古
人埋丹砂數十斛丹汁入井是以飲水而壽陶隱居引
仙經术能除惡氣莊子老聃之役有庚桑楚者徧得老
聃之道北居
畏壘之山

九月二十日微雪懷子由弟二首

岐陽九月天微雪已作蕭條歲暮心短日送寒砧杵急
冷官無事屋廬深愁腸別後能消酒白髮秋來已上簪
近買貂裘堪出塞忽思乘傳知戀切問西琛

杜子美詩廣文先生官獨冷又詩白髮不勝簪漢書乘
傳注師古曰傳者若今之驛古以車謂之傳車其後又
單置馬謂之驛騎詩
憬彼淮夷來獻其琛

江上同舟詩滿篋鄭西分馬涕垂膺未成報國慙書劍
豈不懷歸畏友朋官舍度秋驚歲晚寺樓見雪與誰登
遙知讀易東牕下車馬敲門定不應

詩豈不懷歸畏此簡書左傳
引逸詩豈不欲往畏我友朋

病中聞子由得告不赴商州三首

王注子由與
先生同舉賢

科子由以許直得下第除商州推官而王介甫猶不肯撰辭告未即下故先生自去年十

二月先赴鳳翔至今年秋子由方告下以老
泉傍無侍子奏乞養親三年此所以得告而
也 不赴

病中聞汝免來商旅鴈何時更著行遠別不知官爵好
思歸苦覺歲年長著書多暇真良計從官無功謾去鄉
惟有王城最堪隱萬人如海一身藏

近從章子聞渠說

公自注章子博也

苦道商人望汝來說客有

靈慙直道逋翁久沒厭凡才夷音僅可通名姓癭俗無
由辨頸顯答策不堪宜落此上書求免亦何哉

王注逋翁四皓也避秦隱於商山白樂天詩漢容黃綺
為逋客李商隱商於詩割地張儀詐謀身綺季長歐陽
公汝癭詩無
由辨肩頸

辭官不出意誰知敢向清時怨位卑萬事悠悠付杯酒
流年冉冉入霜髭策曾忤世人嫌汝易可忘憂家有師
此外知心更誰是夢魂相覓苦參差

病中大雪數日未嘗起觀號令趙薦以詩相屬
戲用其韻答之

經旬卧齋閣終日親劑和不知雪已深但覺寒無奈
一作

那飄蕭牕紙一作紙牕明堆壓簷板墮公自注闕中皆以板為簷風颭助

凝冽幃幔困掀一作軒簾惟思近醇釀未敢窺璨瑳何時

反炎赫卻欲躬白磨誰言坐無氈尚有裘充貨西鄰歌

吹發促席寒威挫崩騰踏成逕繚繞飛入座人歡瓦先

融飲雋餅屢卧嗟予獨愁寂空室自困坷欲為後日賞

恐被遊塵浣寒更報新霽皎月懸半破有客獨苦吟清

夜默自課詩人例窮蹇秀句出寒餓何當暴霜雪庶以

躡郊賀

魏都賦著馴風之醇釀注以酒喻政王注璨瑳以玉比雪之明也後漢馮衍妻妒悍不畜媵妾兒女自操井臼以言勞則體中生熱也杜子美贈鄭虔詩才名三十年坐客寒無氈西京雜記司馬相如初與文君還成都居貧愁懣以所著鸛鷖裘就市人楊昌貫酒與文君為歡左傳士文伯謂投壺之中曰中雋歐陽詩不覺長耕卧墻曲韓退之詩勿使塵泥浣又新月憐半破杜詩詩家秀句傳寒餓王注郊賀孟郊李賀也

歲晚相與饋問為饋歲酒食相邀呼為別歲至

除夜達旦不眠為守歲蜀之風俗如是余官於岐下歲暮思歸而不可得故為此三詩寄子由

饋歲

農功各已收歲事得相佐為歡恐無及假物不論貨山

川隨出產貧富稱小大寘盤巨鯉橫發籠去聲雙兔卧富

人事華靡綵繡光翻座貧者愧不能微挈出春磨官居

故人少里巷佳節過亦欲舉鄉風獨唱無人和

詩商頌歲事來辟左傳以相輔佐王符潛夫論富者競欲相過貧者恥不逮及也

別歲

故人適千里臨別尚遲遲人行猶可復歲行那可追問
歲安所之遠在天一涯已逐東流水赴海歸無時東鄰

酒初熟西舍穉亦肥且為一日歡慰此窮年悲勿嗟舊
歲別行與新歲辭去去勿回顧還君老與衰

古詩各在天一涯古樂府
百川東到海何時復西歸

守歲

欲知垂盡歲有似赴壑蛇修鱗半已沒去意誰能遮况
欲繫其尾雖勤知奈何兒童彊不睡相守夜謹一作譁

晨雞且勿唱更鼓畏添樞坐久燈燼落起看北斗斜明
年豈無年心事恐蹉跎努力盡今夕少年猶可誇

晉書賈皇后云繫狗當繫頸今反繫其尾

和子由踏青

子由踏青詩序眉之東門十數里有山曰墓頭山上有亭榭松竹山

下臨大江每正月八日士女相與遊嬉飲酒於其上謂之踏青也

春風陌上驚微塵
游人初樂歲華新
人間正好路傍飲
麥短未怕游車輪
城中居人厭城郭
喧闐曉出空四鄰
歌鼓驚山草木動
簞瓢散野鳥鳶馴
何人聚衆稱道人
遮道賣符色怒嗔
宜蠶使汝蠶如甕
宜畜使汝羊如麕
路人未必信此語
強為買服禳新春
道人得錢徑沽酒

醉倒自謂吾符神

太平廣記國客者濟陰人嘗種五色香草積十年服其實一日有五色蛾止其旁客收而畜之至蠶時有女夜半至自稱客妻道蠶之狀客與俱蠶得一百二十頭蠶皆如蠶每繅一頭六十日乃盡遂俱仙王注爾雅曰麇大羊杜預奏事曰臣前在南開魏興北山有野羊大者數千百斤試令求之牝牡各得一豈爾雅所謂麇者乎麇與麇皆從鹿挨傍押韻成都古今記三月三日太守出北門宴學射山蓋張百子以是日上升即此地也男現女巫會於此寫符篆以驚人云宜田蠶辟災疫佩者戴者信以為然

和子由蠶市

子由詩序眉之二月望日蠶蠶器於市因作樂縱觀謂之蠶市

蜀人衣食常苦艱蜀人游樂不知還千人耕種萬人食

一年辛苦一春閒，閒時尚以蠶為市。共忘辛苦，遂欣歡。
 去年霜降斫秋荻，今年箔積如連山。破瓢為輪土為釜，
 爭買不翅金與紈。憶昔與子皆童丱，音年年廢書走市。
 觀市人爭誇鬪巧智，一作智巧野人喑啞遭欺謾。詩來使我
 感舊事，不悲去國悲流年。

王注：荻箔乃薦盤之具，瓢輪土釜乃綠絲之物。詩齊風：總角丱兮。注：束髮貌。

和子由苦寒見寄

人生不滿百，一別費三年。三年吾有幾，棄擲理無還。長

恐別離中推我鬢與顏念昔喜著書別來不成篇細思
平時樂乃為憂所緣吾從天下士莫如與子歡羨子久
不出讀書蝨生氈丈夫重出處不退要當前西羌解仇
隙猛士憂塞壩而宣切廟謀雖不戰鹵意久欺天山西良
家子錦緣貂裘鮮千金買戰馬百寶粧刀鏢何時逐汝
去與鹵試周旋

漢書趙充國傳元康元年先零與諸羌種豪二百餘人
解仇交質盟誓申屠嘉傳太上皇廟壩垣注宮外垣餘
地也壩壩全按塞壩塞垣也又六郡良家子皆習騎射
又山西出將左傳晉文公謂楚子曰左執鞭鞭右屬橐

健以與
君周旋

和子由論書

吾雖不善書曉書莫如我苟能通其意常謂不學可貌
妍容有贖擊同璧美何妨橢端莊雜流麗剛健含婀娜好
之每自譏不謂子亦頗書成輒棄去謬被旁人裹體勢

本闊落結束入細麼子詩亦見推語重未敢荷邇來又

學射力薄愁官竒

公自注官箭十二把
吾能十一把箭耳

多好竟無成不

精安用影何當盡屏去萬事付懶惰吾聞古書法守駿

莫如跛世俗筆苦驕衆中強鬼駮鍾張忽已遠此語與

時左

莊子天運篇西施病心而曠其里爾雅績小而橢注貝狹而長曰橢班彪王命論么麼不及數子注細小曰麼漢書陳涉傳夥涉之為王沈沈者注楚人謂多為夥說文馬搖頭曰駮王注鬼駮不安帖貌鍾張鍾繇張芝也

記所見開元寺吳道子畫佛滅度以荅子由

名畫

記吳陽翟人土畫初名道子玄宗改名道玄下筆有神官至寧王友

西方真人誰所見衣被七寶從雙狻音酸當時修道頗辛

苦拍生兩肘鳥

一作鳥

巢肩初如濛濛隱山玉漸如濯濯

出水蓮道成一旦就空滅奔會四海悲人天翔禽哀響
動林谷獸鬼躑躅淚迸泉龐眉深目彼誰子遶牀彈指
性自圓隱如寒月墮清晝空有孤光留故躔春遊古寺
拂塵壁遺像久此霾香煙畫師不復寫名姓皆云道子
口所傳從橫固已蔑孫鄧有如巨鰐吞小鮮來詩所誇
孰與此安得攜挂其旁觀

穆天子傳狡狴日行五百里郭璞注獅子也一名虺獸
中之王也傳燈錄佛於雪山入定有野鷲於佛頂置巢
時去時來大智度論曰佛在陰菴羅雙樹間入般涅槃
卧北首大地震動諸三學人僉然不樂郁伊交涕諸無

學人但念諸法一切無常杜詩淚下如迸泉王注月墮
清畫以譬佛之滅度光留故躔以譬佛之雖寂滅而猶
在圖畫見聞志孫知微字太古通義彭山人每畫聖像
必齋戒疏淪方始援筆鄧名隱物類相感志南海有鱈
魚其狀若鼉四足長六七尺有
齒如劍老子治大國若烹小鮮

和子由寒食

寒食今年二月晦樹林深翠已生煙遶城駿馬誰能借
到處名園意盡便但挂酒壺那計盞偶題詩句不須編
忽聞嘯鴟驚羈旅江上何人治廢田

和劉長安題薛周逸老亭周善飲酒未七十而

致仕

王注劉長安劉敞原父也薛周莫考

近聞薛公子早退驚常流買園招野鶴鑿井動潛蚪自
言酒中趣一斗勝涼州翻然拂衣去親愛挽不留隱居
亦何樂素志庶可求所亡嗟無幾所得不啻酬青春為
君好白日為君悠山鳥奏琴筑野花弄閒幽雖辭功與
名其樂實素侯至今清夜夢尚驚冠壓頭誰能載美酒
往以大白浮之子雖不識因公可與遊

蜀都賦下高鵠出潛蚪續漢書扶風孟陀以蒲萄酒一
斗遺張讓即得涼州刺史晉書鄧攸傳吳人歌之曰鄧

侯挽不留謝令推不去史貨殖傳今有無秩祿之奉爵
邑之入而樂與之比者命曰素封又千金之家比一都
之君巨萬者乃與王者同樂劉向說苑魏文侯與大
夫飲使公乘不仁為觴政曰飲不盡者浮以大白

中隱堂詩

并序

岐山宰王君紳其祖故蜀人也避亂來長安而遂
家焉其居第園圃有名長安城中號中隱堂者是
也予之長安王君以書戒其子弟邀予遊且乞詩

甚勤因為作此五篇

前地理志京兆尹縣十二其一曰長安高帝五年置惠帝

元年初城
六年成

去蜀初逃難遊秦遂不歸園荒喬木老堂在昔人非鑿
石清泉激開門野鶴飛退居吾久念長恐此心違
徑轉如修蟒坡垂似伏鼈樹從何代有人與此堂高好
古嗟生晚偷閒厭久勞王孫早歸隱塵土汙君袍

劉安招隱士王孫遊兮不歸陸
機詩京洛多風塵素衣化為緇

二月驚梅晚幽香此地無依依慰遠客皎皎似吳姝不
恨故園隔空嗟芳歲徂春深桃杏亂笑汝益羈孤

韓退之詩二月初驚見草芽
杜子美詩丹橘黃柑此地無

翠石如鸚鵡何年別海壖貢

一作來

隨南使遠載壓渭舟

偏已伴喬松老那知故國遷金人解辭漢汝獨不潸然

廣韻壖

江河邊地李賀金銅仙人辭漢歌

序官官既圻盤仙人臨載乃潸然泣下

都城更幾姓到處有殘碑古隧埋蚪蚪崩崖露伏龜安
排壯亭榭收拾費金貲岫嶠何須到韓公浪自悲

西都賦三成帝畿注周秦漢也古文四聲韻序科斗書
古文也所謂蒼頡本體形多頭麤尾細腹壯團圓似水
蟲之蚪蚪隋志五品以上立碑螭首龜趺韓退之詩岫
嶠山尖神禹碑字青石赤形摹竒又云我來咨嗟涕漣
而千搜萬索何處有

森森綠樹猿猴悲

鳳翔八觀 并序

鳳翔八觀詩記可觀者八也昔司馬子長登會稽探禹穴不遠千里而李太白亦以七澤之觀至荊州二子蓋悲世悼俗自傷不見古人而欲一觀其遺蹟故其勤如此鳳翔當秦蜀之交士大夫之所朝夕往來此八觀者又皆跬步可至而好事者有不能徧觀焉故作詩以告欲觀而不知者

石鼓歌

冬十二月歲辛丑我初從政見魯叟舊聞石鼓今見之
文字鬱律蛟蛇走細觀初以指畫肚欲讀嗟如箝在口
韓公好古生已遲我今况又百年後強尋偏傍推點畫
時得一二遺八九我車既攻馬亦同其魚維鱖貫之柳

公自注其詞云我車既攻我馬亦同又云其魚維何維
鱖維鯉何以貫之維揚與柳惟此六句可讀餘多不可
通

古器縱橫猶識鼎象星錯落僅名斗模糊半已似癡
胝詰曲猶能辨跟肘娟娟缺月隱雲霧濯濯嘉禾秀葭
莠漂流百戰偶然存獨立千載誰與友上追軒頡相唯

諾下揖一作把

冰斯同轂轂丘侯切

憶昔周宣歌鴻鴈

當時籀史變蚪蚪厭亂人方思聖賢中興天為生耆耆

東征徐鹵闕墟虎北伏

一作伐

犬戎隨指嗾

蘇后切

象胥雜

沓貢狼鹿方召聯翩賜圭卣遂因鼓鞀思將帥豈為考

擊煩矇瞍何人作頌比崧高萬古斯文齊岫嶽勳勞至

大不矜伐文武未遠猶忠厚欲尋年歲無甲乙豈有名

字記誰某自從周衰更七國竟使秦人有九有掃除詩

書誦法律投棄俎豆陳鞭杻當年何人佐祖龍上蔡公

子牽黃狗登山刻石頌功烈後者無繼前無偶皆云皇
帝巡四國烹滅彊暴救黔首六經既已委灰塵此鼓亦
當遭擊掇傳聞九鼎淪泗上欲使萬夫沈水取暴君縱
欲窮人力神物義不汙秦垢是時石鼓何處避無乃天
工令鬼守興亡百變物自間富貴一朝名不朽細思物
理坐歎息人生安得如汝壽

歐陽集古錄石鼓久在岐陽初不見稱於世至唐人始
盛稱之而韋應物以為周文王之鼓至宣王時刻爾韓
退之直以為宣王之鼓今在鳳翔縣孔子廟鼓有十先
時散棄於野鄭餘慶始置於廟而亡其二皇祐四年向

傳師求於民間得之十鼓乃足其文可見者四百六十
有五磨滅不可識者過半然其可疑者四退之好古不
妄者子姑取以為信耳至於字畫亦非史籀不能作也
西京賦隱麟鬱律甘泉賦雷鬱律於巖突唐虞世南學
書常於被下以指畫肚韓退之苦寒詩濁醪沸入喉口
角如銜符又石鼓歌嗟予好古生苦晚對此涕淚雙滂
沱王注軒頡軒轅蒼頡冰斯李斯李陽冰也頡為黃帝
史因觀鳥迹始作書契古文是也周宣王時史籀著大
篆十五篇與古稍異謂之籀書秦相李斯取籀文或頗
省改謂之小篆焚先典而古文絕矣漢魯共王壞孔子
宅得尚書春秋論語孝經時以不復知古文故謂之蝌
蚪書諸山刻石荆玉璽文及銅人銘皆斯所書謂之玉
筋體唐李陽冰獨得斯用筆意論者謂冰愈於斯也小
雅鴻雁詩序曰美宣王也鄭箋承厲王衰亂之敝而起
興復先王之道以安集衆民也大雅常武詩省此徐土
又進厥虎臣闕如虺虎國語穆王將征犬戎祭公謀父

諫不聽遂征之得四白狼四白鹿以歸左傳宣二年晉
侯飲趙盾酒伏甲將攻之公族夫葬馬說文使犬聲也
周官象胥掌蠻貊閩貉戎狄之國使掌傳王之言而諭
說馬大雅江漢詩王命召虎釐爾圭瓚秬鬯一卣方方
叔也記聽鼓鼙之聲則思將帥之臣大雅崧高詩毛傳
尹吉甫美宣王也岫嶠注見前秦始皇本紀始皇三十
六年秋使者從關東夜過華陰平舒道有人持璧遮使
者曰為吾遺高池君明年祖龍死使者問其故忽不見
使者奉璧具以聞始皇嘿然良久曰山鬼固不過知一
歲事也退言曰祖龍者人之先也史記李斯傳斯出獄
與其中子俱執顧謂其中子曰吾欲與若復牽黃犬俱
出上蔡東門逐狡兔豈可得乎始皇本紀二十八年始
皇東行郡縣上鄒嶧山刻石頌秦德又南登瑯邪作瑯
邪臺刻石頌秦德二十九年登之果刻石刻詞有曰烹
滅強暴振救黔首又始皇還過彭城齋戒禱祠欲出周
鼎泗水使千人沒水求之弗得莊子逍遙遊吾為其無

用而拈之注學而碎之也韓石鼓歌
而淋日炙野火燎鬼物守護頰撓呵

詛楚文

公自注碑獲於開元寺土下今在太
守便廳秦穆公葬於雍索泉祈年觀

下今墓在開元寺之東南數十步則寺豈
祈年之故基邪淮南王遷於蜀至雍道病

卒則雍非長安
此乃古雍也

崢嶸開元寺髣髴祈年觀舊築掃成空古碑埋不爛詛
書雖可讀字法嗟久換詞云秦嗣王敢使祝用瓚先君
穆公世與楚約相捍質之於巫咸萬葉期不叛今其後
嗣王乃敢構多難剗胎殺無罪親族遭圍絆計其所稱

訴何啻桀紂亂吾聞古秦俗面詐背不汗豈惟公子印

社鬼亦遭謾遼哉千載後發我一笑

一作笑

祭

王注問詛楚文於學古文者云有數本其文皆同唯神名異開元寺下所得乃詛於巫咸神者是數本中唯巫咸之文筆法最精其家無之唯有此詛於亞駝神一本詳其篆文乃先生詩中語也今載於此字有不可識者則書闕以補之其文曰秦嗣王敢用吉王宣壁使其祝宗邵葵布懇告於丕顯大神亞駝以底楚王熊相之多罪者我先君穆王及楚成王是戮力同心兩邦若壹絆以婚姻衿以齊盟曰萬葉子孫毋相為不利親印丕顯大神亞駝而質焉今楚王熊相庸回無道淫伐湛亂宣侈競縱變渝盟制內之則歸虐不宰刑殺孕婦幽刺親戚拘圉其叔父寘諸冥室積棺之中外之則冒改久闕不畏皇天上帝及丕顯大神亞駝光烈威神而兼倍十

八世之盟詛率諸侯之兵以臨加我欲剋伐我社稷
滅我百姓口蔑我皇天上帝及丕顯大神亞駝之郊祠
圭玉犧牲口取我邊城新郢及於口郢及於口不敢曰
可今又悉興其衆張矜怠怒口甲口兵奮士盛師以偏
我邊境將欲覆其口亦應受皇天上帝及丕顯大神亞
駝之幾靈德賜克剋楚師復略我邊城敢數楚王熊相
之倍盟口詛著諸名章以盟大神之威神其文如此秦
始皇本紀注祈年宮在雍史記商鞅傳孝公使商鞅將
而伐魏魏使公子卬將而擊之鞅詐公子卬會盟已飲
伏甲士襲鹵公子卬因攻其軍盡破之以歸秦殺梁軍
士繁然
皆笑

王維吳道子畫

吳道子見前開元寺注季南
名畫記王維字摩詰以詞學

知名官至尚
書右丞工畫

何處訪吳畫普門與開元開元有東塔摩詰留手痕吾
觀畫品中莫如二子尊道子實雄放浩如海波翻當其
下手風雨快筆所未到氣已吞亭亭雙林閒彩暈扶桑
暎中有至人談寂滅悟者悲涕迷者手自捫蠻君鬼伯
千萬萬相排競進頭如黿摩詰本詩老佩芷襲芳蓀今
觀此壁畫亦若其詩清且敦祇園弟子畫鶴骨心如死
灰不復溫門前兩叢竹雪節貫霜根交柯亂葉動無數
一一皆可尋其源吳生雖妙絕猶以畫工論摩詰得之

於象外有如仙翮謝籠樊吾觀二子皆神俊又於維也
歛衽無間言

唐米景元畫斷道子為神品上上摩詰為妙品上上名
畫斷大凡佛之圓光皆須尺寸先定然後規圓而成惟
吳生只一筆又云畫成矣最後方畫圓光風落電轉規
成月圓王注開元寺有道子畫佛在叢林下入涅槃像
又摩詰畫兩叢竹於開元寺莊子形若槁木心若死灰
杜詩畫手看前輩吳生遠擅場又妙絕動宮牆神仙傳
王次仲變篆為隸始皇召之不至將殺之次仲化為大
鳥振翼而起以三大翮墮與使者始皇因為落翮仙
唐張顛傳後輩言筆札者歐虞褚
薛或有異論至張顛曾無間言

維摩像唐楊惠之塑在天柱寺

五代名畫補遺楊惠之與

吳道子同師張僧繇筆蹟號為畫友工藝
並著而道子聲光獨顯遂焚棄筆硯發憤
專思塑作能奪僧繇
畫相與道子爭衡

昔者子輿病且死其友子祀往問之跼蹐鑿井自歎息
造物將安以我為今觀古塑維摩像病骨磊砢如枯龜
乃知至人外生死此身變化浮雲隨世人豈不頑且好
身雖未病心已疲此叟神完中有恃談笑可卻千熊羆
當其在時或問法俛首無言心自知至今遺像兀不語
與昔未死無增虧田翁俚婦那肯顧時有野鼠銜其髭

見之使人每自失誰能與結一作無言師

莊子子輿有病子祀往問之曰偉哉夫造物者將以予為此拘拘也又跼躄而鑑於井注跼躄病而不能行貌維摩經是身如浮雲須臾變滅又文殊師利問維摩詰何等是菩薩不二法門時維摩詰默然無言晉書謝靈運髡美臨刑因施作南海祇洹寺維摩詰像髡寺人保惜略不污損

東湖

吾家蜀江上江水綠如藍邇來走塵土意思殊不堪况當岐山下風物尤可慙有山秃如赭有水濁如泔不謂郡城東數步見湖潭入門便清奧恍如夢西南泉源從

高來隨波走涵涵東去觸重阜盡為湖所貪但見蒼石

螭開口吐清甘借汝腹中過胡為目耽耽新荷弄晚涼

輕棹極幽探飄飄忘遠近偃息遺佩蓼簪同深有龜一作魚

與魚一作龜淺有螺與蚌曝晴復戲雨戢戢多於蠶浮沈

無停餌倏忽遽滿籃絲緡雖強致瑣細安足戡聞昔周

道興翠鳳棲孤嵐飛鳴飲此水照影弄毵毵公自注此古飲鳳池

也至今多梧桐合抱如彭聃綵羽無復見上有鷓搏鷓

烏含切嗟予生雖晚好古意所耽耽同圖書已漫漶猶復訪

僑郟卷阿詩可繼此意久已含扶風古三輔政事豈汝
諳聊為湖上飲一縱醉後談門前遠行客劫劫無留驂
問胡不回首無乃趁朝參予今正疎懶官長幸見函不
辭日游再行恐歲滿三暮歸仍倒載鐘鼓已齟齬

詩小雅終朝采藍鄭箋藍染草也李白詩山光水色青
於藍白樂天詩春來江水綠如藍韓南山詩或赤若禿
鬚秦始皇本紀始皇至湘山祠逢大風幾不得度上問
博士曰湘君何神對曰堯女舜妻死而葬於此始皇大
怒使刑徒三千人伐湘山木赭其山寰宇記周文王之
時丹鳳鳴於岐山故亦曰鳳皇堆王注僑郟子產也晉
侯稱其博物君子郟子言少昊氏以鳥名官仲尼曰天
子失官學在四尼猶信三輔黃圖京兆在故城內尚冠

里馮翊在故城內太上皇廟西南扶風在夕陽街北三
輔者謂主爵中尉及左右內史漢武帝改曰京兆尹左
馮翊右扶風共治長安城中是為三輔後漢光武之後
扶風出治楓里馮翊出治高陵晉書山簡傳日暮倒載
歸酌酌無所知宋韻
注 籛籛鐘鼓微也

真興寺閣

山川與城郭漠漠同一形市人與鴉鵲浩浩同一聲此
閣幾何高何人之所營側身送落日引手攀飛星當年
王中令斫木南山頽寫真留閣下鐵面眼有稜身強一作
長八九尺與閣兩崢嶸古人雖暴恣作事今世驚登者

尚呀喘作者何以勝曷不觀此閣其人勇且英

王注王彥超周末宋初為鳳翔節度使晉書桓溫傳劉惔嘗稱之曰溫眼如紫石稜

李氏園

公自注李茂貞園也今為王氏所有五代史茂貞本姓宋名文通唐僖宗

問以功拜鳳翔隴右節度使賜姓名昭宗景福元年反犯京師加拜尚書令封岐王

後唐莊宗同

光二年卒

朝游北城東回首見修竹下有朱門家破墻圍古屋舉
鞭叩其戶幽響答空谷入門所見夥十步九移目異花
兼四方野鳥喧百族其西引溪水活活轉墻曲東注入

深林林深牕戶綠水光無竹淨時有獨立鵠林中百尺
松歲久蒼鱗感豈惟此地少意恐關中獨小橋過南圃
一作浦夾道多喬木隱如城百雉挺若舟千斛陰陰日光

淡黯黯秋氣蓄盡東為方池野鴈雜家鶩紅梨驚合抱
映島孤雲馥春光水溶漾雪陣風翻撲其北臨長溪波
聲卷平陸北山卧可見蒼翠間磽秃我時來周覽問此
誰所築云昔李將軍負險乘衰叔抽錢算閒口但未擁
羹粥當時奪民田失業安敢哭誰家美園囿藉沒不容

贖此亭破千家鬱鬱城之麓將軍竟何事蟻蝨生刀韜

何嘗載美酒來此駐車轂空使後世人聞名頸猶縮自公

注俗猶呼皇后園我今官正閒屢至因休沐人生營居

止竟為何人卜何當辦一身永與清景逐

左傳却城過百雉國之害也注方丈曰堵三堵曰雉漢書注漢律入出一算算百二十錢惟賈人與奴婢倍算貢禹傳禹言口錢起武帝民產子三歲則出口錢故民重困至於生子輒殺宜令免七歲去齒乃出口錢年二十乃算唐史肅宗時軍用不給乃稅閒架廣韻韜弓衣史記石建為郎中令每五日洗沐歸謁親漢書張安世傳休沐未嘗出

秦穆公墓

三輔黃圖秦泉宮皇覽曰秦穆公墓在秦泉宮祈年觀下

秦泉在城東墓在城中無百步乃知昔未有此城秦人

以泉識公墓

識音志

昔公生不誅孟明豈有死之日而忍

用其良乃知三子殉公意亦如齊之二子從田橫古人
感一飯尚能殺其身今人不復見此等乃以所見疑古
人古人不可望今人益可傷

左傳文六年秦伯任好卒以子車氏之三子奄息仲行
鍼虎為殉皆秦之良也國人哀之為之賦黃鳥史記田
儋傳田橫與其客二人乘傳詣洛陽至尸鄉廐置自剄
高帝為之流涕而拜其二客為都尉以王者禮葬田橫

既葬二客穿其冢旁孔皆自到下從之後漢李固傳
感古人一飯之報注靈輒也靈輒事見左傳宣二年

和子由聞子瞻將如終南太平宮谿堂讀書

役名則已勤徇身則已媮我誠愚且拙身名兩無謀始
者學書判近亦知問囚但知今當為敢問向所由士方
其未得惟以不得憂既得又憂失此心浩難收譬如倦
行客中路逢清流塵埃雖未脫暫憩得一漱我欲走南
澗春禽始嚶啾鞅掌久不決爾來已徂秋橋山日月迫
府縣煩差抽王事誰敢愬民勞吏宜羞中間罹旱暵欲

學喚雨鳩千夫挽一木十步八九休渭水潤無泥菑堰
旋插修對之食不飽餘事更遑求近日秋雨足公餘試
新筍劬勞幸已過朽鈍不任鏤秋風欲吹帽西阜可縱
遊聊為一日樂慰此百日愁

唐有書判拔萃科史記黃帝葬橋山前漢溝洫志武帝
歌曰隕林竹兮捷石菑廣韻筍酒筍晉書九月九日桓
溫讌於龍山風
吹孟嘉帽落

將往終南和子由見寄

人生百年寄鬢鬚富貴何啻葭中草惟將翰墨留染濡

絕勝醉倒蛾眉扶我今廢學如寒筭久不吹之澀欲無

歲云暮矣嗟幾餘欲往南溪侶

一作旅

禽魚秋風吹雨涼

生膚夜長耿耿添漏壺窮年弄筆衫袖烏古人有之我
願如終朝危坐學僧趺閉門不出閑履鳧下視官爵如
泥淤嗟我何為久踟躕歲月豈肯與汝居僕夫起餐秣

吾駒

前漢書非有葭莩之親注葭裏之白皮者喻輕薄也韓
子齊宣王好筭必三百人齊吹南郭先生不善筭而濫
於三百之中以食祿湑王立欲一一吹之先生乃逃趙
壹非草書歌十日一筆月數丸墨領袖如皁脣齒皆黑

後漢王喬有神術顯宗時為葉令每朔望來朝明帝怪之令太史伺望輒有雙鳧從東來羅之得雙鳧詔尚書診視乃四年中所賜履舄也韓退之送李愿歸盤谷序膏吾車兮秣吾馬又天星詩僕夫起餐車載脂

七月二十四日以久不雨出禱磻溪是日宿虢

縣二十五日晚自虢縣渡渭宿於僧舍曾閣閣故曾氏所建也夜久不寐見壁有前縣令趙薦留名有懷其人

龕燈明滅欲三更歌枕無人夢自驚深谷留風終夜響亂山銜月半牀明故人漸遠無消息古寺空來看姓名

欲向磻溪問姜叟僕夫屢報斗杓傾

二十六日五更起行至磻溪未明

夜入磻溪如入峽照山炬火落驚猿山頭孤月耿猶在
石上寒波曉更喧至人舊隱白雲合神物已化遺蹤蜿
安得夢隨霹靂駕馬上傾倒天瓢翻

王注至人舊隱太公也神物龍也磻溪有龍於此地禱
雨也酉陽雜俎李鄴在北都介休百姓送解牒宿晉祠
宇下夜有人叩門云介休王暫借霹靂車至介休收麥
良久數人共持一物如幢上綴旗幡凡十八葉有光如
雷以授之次日介休大雷雨損麥千餘頃又李靖嘗投
宿一巨宅有老婦延之中夜叩戶甚迅婦出謂靖曰老

婦龍也二子俱出今天命行雨欲煩一行遂鞚青驄馬
以一瓢水與之戒曰馬躩地嘶鳴即取水一滴滴馬鬣
上一滴乃地上一尺慎勿多也靖見旱極連下三十餘
滴靖歸婦驚語曰平地水深三文矣詩意主禱雨故用
事此

是日自磻溪往陽平憩於麻田青峰寺之下院

翠麓亭

不到峰前寺空來渭上村此亭聊可喜修徑豈辭捫谷
映朱欄秀山含古木尊路窮驚石斷林缺見河奔馬困
嘶青草僧留薦晚飧我來秋日午旱久石牀温安得雲

如蓋能令雨瀉盆共看山下稻涼葉晚翻翻

三水小牘安定郡有峴陽峰峰上有池若雨則雲起池中如車蓋然故里諺曰峴山張蓋雨霽霈杜詩白帝城頭雲若屯白帝城下雨翻盆

二十七日自陽平至斜谷宿於南山中蟠龍寺

橫槎晚渡碧澗口騎馬夜入南山谷谷中暗水響瀧瀧
嶺上疎星明煜煜寺藏崑底千萬仞路轉山腰三百曲
風生饑虎嘯空林月黑驚麕竄修竹入門突兀見深殿
照佛青熒有殘燭媿無酒食待游人旋斫杉松煮溪菽

板閣獨眠驚旅枕木魚曉動隨僧粥起觀萬瓦鬱參差
日亂千巖散紅綠門前商賈負椒苻山後咫尺連巴蜀
何時歸耕江上田一夜心逐南飛鵠

杜甫宿贊上人房詩夜
深殿突兀風動金琅璫

是日至下馬磧憩於北山僧舍有閣曰懷賢南
直斜谷西臨五丈原諸葛孔明所從出師也

南望斜谷口三山如犬牙西觀五丈原鬱屈如長蛇有
懷諸葛公萬騎出漢巴吏士寂如水蕭蕭聞馬過公才

與曹丕豈止十倍加顧瞻三輔間勢若風卷沙一朝長
星墜竟使蜀婦髻山僧豈知此一室老煙霞往事逐雲
散故山依渭斜客來空弔古清淚落悲笳

漢書文帝紀高帝王子弟地犬牙相制注犬牙言地形如犬之牙交相入也長安志引水經注斜水北歷斜谷過五丈原亦謂之武功水又曰武功蓋在渭水南郿縣北是蜀志建興十二年諸葛亮悉大衆由斜谷出以流馬運據武功五丈原與司馬仲達對於渭南分兵屯田為久住之基耕者雜於渭濱之間而百姓安堵軍無私馬詩車攻篇蕭蕭馬鳴毛傳言不謹譁也公詩用此意韻注馬撾鞭也諸葛亮傳先主病篤召亮謂曰君才十倍曹丕必能安國家定大事晉陽秋有星赤而芒角自東北西南流投於亮營三投再還往大還小俄而亮卒

戴記婦人髻而弔也自敗於狐駘始也
蓋魯臧紇敗於狐駘國人逆喪者皆髻

施註蘇詩卷一

欽定四庫全書薈要卷一萬四千九百五十三

集部

施註蘓詩卷二

宋 蘓軾 撰

宋 施元之 註

武進邵長蘅刪補

詩四十五首

起在鳳翔至治平乙巳罷鳳翔任還京師作 施法缺今補

和子由記園中草木十一首

煌煌帝王都赫赫走羣彥嗟汝獨何為閉門觀物變微
物豈足觀汝獨觀不倦牽牛與葵蓼採摘入詩卷吾聞

山東傳置酒攜嫵婉富貴未能忘聲色聊自遣汝今又
不然時節看瓜蔓懷寶自足珍蕤蘭那計畹吾歸於汝
處慎勿嗟歲晚

古樂府有煌煌京洛篇本草牽牛生花如鼓子花稍大
作碧色陶隱居注蓼有三種一紫蓼一香蓼一青蓼晉
書謝安棲遲東山放情丘壑好音樂每遊賞必以妓從
雜騷既滋蘭之九畹兮又樹蕙之百畝王逸注十二畝
畹曰

荒園無數畝草木動成林春陽一已敷妍醜各自矜蒲
菊雖滿架困倒不能任可憐病石榴花如破紅襟葵花

雖粲粲蒂淺不勝簪叢蓼晚可喜輕紅隨秋深物生感
時節此理等廢興飄零不自由盛亦非汝能

種柏待其成柏成人已老不如種叢筍春種秋可倒陰
陽不擇物美惡隨意造柏生何苦艱似亦費天巧天工
巧有幾肯盡為汝耗君看藜與藿生意常草草

萱草雖微花孤秀能自拔亭亭亂葉中一一芳心插牽
牛獨何畏詰曲自牙蘖走尋荆與榛如有宿昔約南齊
讀書處亂翠曉如潑偏工貯秋雨歲歲壞籬落

本草萱草一名鹿蔥嵇
康養生論萱草忘憂

蘆筍初似竹稍開葉如蒲方春節抱甲漸老根生鬚不
愛當夏綠愛此及秋枯黃葉倒風雨白花搖江湖江湖
不可到移植苦勤劬安得雙野鴨飛來成畫圖

行樂惜芳晨秋風常苦早誰知念離別喜見秋瓜老秋
瓜感霜霰莖葉颯已槁宦遊歸無時身若馬繫阜悲鳴
念千里耿耿志空抱多憂竟何為使汝玄髮縞

顏延年褚白馬賦飛黃服阜魏
武樂府老驥伏櫪志在千里

官舍有叢竹結根問囚廳下為人所徑土密不容釘慙
懃戒吏卒插棘護中庭遶砌忽墳裂走鞭瘦吟屨我常
攜枕簟來此蔭寒青日暮不能去卧聽牕風冷

左傳僖四年公祭之
地墳注高起也

芎藭生蜀道白芷來江南漂流到關輔猶不失芳甘濯
濯翠莖滿悒悒清露涵及其未花實可以資筐籃秋節
忽已老苦寒非所堪劇根取其實對此微物慙

本草芎藭生武功川谷陶隱居注蜀中
亦有而細白芷生河東川谷下澤如掌

自我來關輔南山得再遊山中亦何有草木媚深幽

蒲人不識生此亂石溝山高霜雪

一作雪霜

苦苗葉不得抽

下有千歲根蹙縮如蟠蚪長為鬼神守德薄安敢偷

寰宇記咸平中姚咸南採菖蒲有一丈夫謂之曰此菖蒲安期生所餌可以忘老倏而失之神仙傳茅君丹砂二千歲乃結成上帝常使鬼神毒蛇守焉

我歸自南山山翠猶在目心隨白雲去夢遶山之麓汝
從何方來笑齒粲如玉探懷出新詩秀語奪山綠覺來
已茫昧但記說秋菊有如採樵子入洞聽琴筑歸來寫

遺聲猶勝人間曲

公自注八月十一日夜宿府學方和此詩夢與弟游南山出詩數十篇夢

中甚愛之及覺唯記一句云蟋蟀悲秋菊郭璞游仙詩靈妃顧我笑粲然啟玉齒

野菊生秋澗芳心空自知無人驚歲晚惟有暗蛩悲花
開澗水上花落澗水湄菊衰蛩亦蟄與汝歲相期楚客
方多感秋風詠江蘼落英不滿掬何以慰朝飢

呂溫山櫻詩幽處竟誰見芳心空自知李商隱詩莫學漢臣栽首荷還同楚客詠江蘼楚辭離騷危江蘼與辟芷兮紉秋蘭以為佩注香草生於江中故曰江蘼也蘼蘼通楚辭夕食秋菊之落英

周公廟廟在岐山西北七八里廟後百許步有

泉依山湧洌異常國史所謂潤德泉世亂則竭

者也

湘山野錄雍熙二年鳳翔奏岐山縣周公廟有泉湧出相傳時平則流亂則竭至大

中年復流賜號潤德泉後又涸今其泉復湧澄澄甘潔太宗嘉之

吾今那復夢周公尚喜秋來過故宮翠鳳舊依山
碑兀清泉長與世窮通至今游客傷離黍故國諸生詠雨濛
牛酒不來烏鳥散白楊無數暮號風

王注周興鶯鶯鳴於岐山今為鳳翔郭璞江賦巨石碑兀以前却古詩白楊多悲風蕭蕭愁殺人

南溪之南竹林中新構一茆堂予以其所處最

為深邃故名之避世堂

猶恨溪堂淺更穿修竹林高人不畏虎避世已無心隱

几頽如病忘言兀似一作自

瘖茆茨追上古冠蓋謝當今

曉夢猿呼覺秋懷鳥伴吟暫來聊解帶屢去欲攜衾湖
上行人絕堦前暮雪深應逢綠毛叟扣戶夜抽簪

晉史郭文少愛山水游名山歷華陰之崖窮谷無人之
地倚木於樹苦覆其上而居亦無壁障時猛獸為暴入
屋害人而文獨宿十餘年卒無患害莊子南郭子綦隱
几而坐嗒焉似喪其耦史記李斯傳采椽不斷茅茨不
剪皮日休詩劉根昔成道茲塢四
百年粃粃被其體號為綠毛仙

自清平鎮遊樓觀五郡大秦延生仙游往返四
日得十一詩寄舍弟子由同作

樓觀

注見
前卷

鳥噪猿呼晝閉門寂寥誰識古皇尊青牛久已辭
輶
白鶴時來一作來時訪子孫山近朔風吹積雪天寒落日淡

孤村道人應怪遊人衆汲盡階前井水渾

別說老氏乘青牛薄板車續搜神記遼東華表柱上有
鶴集其上曰有鳥有鳥丁令威去家千歲今來歸古樂
府朔風吹積雪柱詩淘
米少汲水汲多井水渾

五郡

古觀正依林麓斷居民來就

一作說

水泉甘亂溪赴渭爭

趨北飛鳥迎山不復南羽客衣冠朝上象野人香火祝

春蠶汝師豈解言符命山鬼何知託老聃

公自注觀有明皇碑言夢

老子告以享國長久之意

授經臺

公自注乃南山一峰耳非復有築處

劍舞有神通草聖海山無事化琴工此臺一覽秦川小
不待傳經意已空

國史補唐張旭善草書自言吾聞公主與擔夫爭道而得筆法之意後見公孫大娘舞劍器而得其神後漢張奐傳注張芝草書為世所寶韋仲將以為草聖也書斷旭書類伯英時謂之亞聖水仙操序伯牙學琴於成連三年而成成連曰吾之學不能移人之情吾師方子春在東海中乃齋糧從之至蓬萊山留伯牙曰吾將迎吾師刺船而去旬時不返伯牙心悲延頸四望但聞海水汨沒山林窅冥羣鳥悲號仰天嘆曰先生將移我情乃援琴而作歌按海山無事化琴工句王注引成連事似為近之又引南史宗少文撫琴動操欲令眾山皆響非詩意矣今刪老子傳經詳見上卷壬寅二月詩注杜子美望嶽詩會當凌絕頂一覽眾山小

大秦寺

晃蕩平川盡坡陀翠麓橫忽逢孤塔迴獨向亂山明信

足幽尋遠臨風卻立驚原田浩如海滾滾

一作
袞袞

盡東傾

漢司馬相如哀二世登陂陁之長阪兮注陂陁不平之貌坡陂通李白詩幽尋無前期乘興不覺遠

仙游潭五首

公自注潭上有寺三二在潭北循黑水而上為東路至南寺渡黑水

西里餘從馬北上為西路至北寺東路險不可騎馬而西路隔潭潭水深不可測上以一本為橋不敢過故南寺有塔望之可愛而終不能到

潭

翠壁下無路何年雷雨穿光搖巖上寺深到影中天我

欲然

一作
燃

犀看龍應抱寶眠誰能

一作
言

孤石上危坐試

僧禪

晉書溫嶠傳嶠旋武昌至牛渚磯水深不可測世云其
下多怪物嶠遂燃犀角而照之須臾見水族覆火奇形
異狀或乘馬車著赤衣者其夜嶠夢人謂曰與君幽明
道別何意相照也意甚惡之嶠至鎮未旬而卒莊子列
禦寇夫千金之珠必在九重之淵驪
龍頷下子能得珠者必遭其睡也

南寺

東去愁攀石西來怯渡橋碧潭如見試白塔苦相招野
饋慚微薄村沽慰寂寥路窮斤斧絕松桂得干霄

北寺

唐初傳有此亂後不留碑畏虎關門早無村得米遲山
泉自入甕野桂不勝炊信美那能久應先學忍飢

杜詩小市常爭米孤城早閉門戰國策燕秦謂楚王曰
國之食貴於玉薪貴於桂謁者難見如鬼王難見如天
帝今臣食玉炊桂因鬼見帝不亦難乎王祭
登樓賦信美而非吾土兮曾何足以久留

馬融石室

未應將軍聘初從季直游絳紗生不識蒼石尚能留豈
害依梁冀何須困李侯吾詩慎勿刻猿鶴為君羞

三輔決錄注摯恂字季直詳見前卷留題仙遊潭注後
漢馬融傳大將軍鄧騭聞融名召為舍人不應命又融

教養諸生常有千數常坐高堂施絳紗帳前授生徒後列女樂弟子以次相傳鮮有入其室者吳祐傳梁冀誣奏李固融在坐為冀草奏祐謂融曰李公之罪成於卿手李公即誅卿何面目見天下之人乎

玉女洞

洞裏吹簫子終年守獨幽石泉為曉鏡山月當簾鉤歲晚杉楓盡人歸霧雨愁送迎應鄙陋誰繼楚臣謳

楚辭沅湘之間其俗信鬼而好祀使巫覡作樂歌舞以娛神蠻荆陋俗詞多鄙俚屈原既放逐見而感之為作九歌韓退之羅池廟碑作迎享送神詩遺柳民俾歌以祀焉

愛玉女洞中水既致兩竝恐後復取而為使者

見給因破竹為契使寺僧藏其一以為往來之
信戲謂之調水符

欺謾久成俗關市有契繻誰知南山下取水亦置符古
人辨淄澠皎若鶴與鳧吾今既謝此但視符有無常恐
汲水人智出符之餘多防竟無及棄置為長吁

漢書終軍傳注繻帛邊也關出入皆以傳傳還因裂繻
頭合以為符信也列子孔子曰淄澠之合易牙能辨之
鶴鳧用莊子鶴
頸長鳧頸短語

自仙游回至黑水見居民姚氏山亭高絕可愛

復憩其上

山鷓曉辭谷似報游人起出門猶屢顧慘若去吾里道
途險且迂繼此復能幾溪邊有危構歸駕聊復柅愛此
山中人縹緲如仙子平生慕獨往官爵同一屣胡為此
溪邊眷眷若有瑛國恩久未報念此慙且泚臨風浩悲
咤萬世同一軌何年謝簪紱丹砂留迅晷

易繫于金柅注止輪木漢書郊祀志天子曰
嗟乎誠得如黃帝吾視去妻子如脫屣耳

南溪有會景亭處衆亭之間無所見甚不稱其

名子欲遷之少西臨斷岸西嚮可以遠望而力
未暇特為製名曰招隱仍為詩以告來者庶幾
遷之

飛簷臨古道高榜勸遊人未即令公隱聊須濯路塵
芟分聚落烟火傍城闔林缺湖光漏牕明野意新居民
惟白帽過客謾朱輪山好留歸屐風回落醉巾他年誰
改築舊製不須因再到吾雖老猶堪作坐賓

南史和帝紀百姓皆著下屋白紗帽而反裙覆頂楊惲
傳乘朱輪者十人落醉巾王注引孟嘉落帽事已見前

卷

凌虛臺

王注在鳳翔廨後園陳希亮知鳳翔時建先生集載凌虛臺記

才高多感激道直無往還
不如臺上舉酒邀青山
青山雖云遠似亦識公顏
崩騰赴幽賞披豁露天慳
落日銜翠壁暮雲點烟鬟
浩歌清興發意末禮刪
是時歲云暮微雪灑袍斑
吏退迹如掃賓來勇躋攀
臺前飛鴈過臺上雕弓彎
聯翩向空墜一笑驚塵寰

李太白詩青山猶銜半邊日韓退之詩擢玉紆烟鬟又雉帶箭詩衝人決起百餘尺紅翎白簇隨傾斜將軍仰

笑軍吏賀五色離披
馬前墮詩似取其意

竹飀

王注竹飀食
竹根之鼠也

野人獻竹飀腰腹大如盎
自言道傍得採不費置網鷓
夷讓圓滑混沌慙瘦爽兩牙
雖有餘四足僅能鬐逢人
自驚蹶悶若兒脫襁念此微
陋質刀几安足枉就擒太
倉卒羞愧不能饗南山有孤
熊擇獸行舐掌

韓退之詩腰腹空大何能為
鷓夷酒器詳本卷次韻柳
子玉詩注神異經崑崙西有
獸焉其狀如犬長毛四足
似熊名曰混沌退之詩擇
肉於熊羆有視兔與狸

漢陂魚

公自注陂在鄆縣王注杜詩有漢陂行字從水從美以陂中魚故得名漢音美

霜筠細破為雙掩中有長魚如臥劍紫荇穿顛氣慘悽
紅鱗照座光磨閃攜來雖遠鬣尚動烹不待熟指先染
坐客相看為解顏香粳飽送如填塹早歲嘗為荆渚客
黃魚屢食沙頭店濱江易採不復珍盈尺輒棄無乃僭
自從西征復何有欲致南烹嗟久欠游儵瑣細空自腥
亂骨縱橫動遭砭故人遠餽何以報客俎久空驚忽瞻
東道無辭信使頻西鄰幸有庖糞魚久切

孟浩然詩游魚擁劍來左傳宣公四年鄭靈公烹龜子
公之食指動公故弗與子公怒染指於鼎嘗之而出曹
植詩食若填巨壑杜子美詩半濕搗香粳韓退之詩浙
玉炊香粳杜詩頓頓食黃魚地志沙頭鎮屬荆南府韓
退之詩我來禦臈
懸自宜味南烹

讀道藏

嗟予亦何幸偶此琳宮居宮中復何有戢戢千函書盛
以丹錦囊冒以青霞裾王喬掌關籥蚩尤守其廬乘間
竊掀攪涉獵豈暇徐至人悟一言道集由中虛心間反
自照皎皎如芙蕖千歲厭世去此言乃蘧籛人皆忽其

身治之用土苴何暇及天下幽憂吾未除

韓退之贈崔立之詩載載已多如束筍漢武內傳帝見西王母巾器中有一卷小黃書盛以紫錦之囊帝問此何書曰五岳真形圖也其文祕禁令侍女宋靈賓更取一圖以與帝靈賓探懷中得一卷盛以雲錦之囊因以付帝乾膜子何讓之見一老翁歌讓之遂入丘化狐遁去案上得書一紙云何以蔽裸霞裾雲紉王注蚩尤神名道藏中多畫蚩尤守禦之狀前漢賈山涉獵書記不能為醇儒莊子惟道集虛王注道家存想法當想心如未開蓮花韻注蘧篠敝竹器也莊子千歲厭世去而上仙又道之真以治身其土苴以治天下又堯以天下讓子州支父子州支父曰我適有幽憂之疾未暇治天下也

十二月十四日夜微雪明日早往南溪小酌至

晚

南溪得雪真無價，走馬來看及未消。
獨自披榛尋履迹，最先犯曉過朱橋。
誰憐破屋眠無處，坐覺村飢語不囂。
惟有暮鴉知客意，驚飛千片落寒條。

趙景真與稽茂齋書涉澤求蹊披榛覓路履迹蓋用東郭先生雪中履迹也杜牧之詩澤濶鳥來遲村飢人語早

九月中曾題二小詩於南溪竹上既而忘之昨日再遊見而錄之

湖上蕭蕭疎雨過山頭靄靄暮雲橫
陂塘水落荷將盡
城市人歸虎欲行

誰謂江湖居而為虎豹宅
焚山豈不能愛此千竿碧

司竹監燒葦園因召都巡檢柴貽勛左藏以其
徒會獵園下

官園刈葦歲留槎深冬放火如紅霞
枯槎燒盡有根在
春雨一洗皆萌芽黃狐老兔最狡捷
賣侮百獸常矜誇
年年此厄竟不悟但愛蒙密爭來家
風迴焰卷毛尾熱

欲出已被蒼鷹遮野人來言此最樂徒手曉

一作時

出歸

滿車巡邊將軍在近邑呼來颯颯從矛叉戍兵久間可

小試戰鼓雖凍猶堪搗雄心欲搏南澗虎陣勢頗學常

山蛇霜乾火烈聲爆野飛走無路號且呀迎人截來若

苦一作逢箭避犬一作逸去窮投置擊鮮走馬殊未厭但

恐落日催棲鴉弊旗仆鼓坐數獲鞍挂雉兔肩分麇主

人置酒聚狂客紛紛醉語晚更譁燎毛燔肉不暇割飲

啖直欲追羲媧青丘雲夢古所詫與此何啻百倍加苦

遭諫疏說夷羿又被賦客嘲淫奢豈如閒官走山邑放
曠不與趨朝衙農工已畢歲云暮車騎雖少賓殊佳酒
酣上馬去不告獵獵霜風吹帽斜

周官大司馬羣吏弊旗注弊仆也司馬相如子虛賦秋
田乎青丘彷徨乎海外吞若雲夢者八九其於胷中曾
不芥蒂左傳魏絳諫晉侯引虞人之箴曰在帝夷羿冒
於原獸又相如賦盛推雲夢以為高奢言淫樂而顯侈
靡竊為足下不取也北史獨孤信嘗因獵日暮馳馬
入城其帽微側詰旦人有戴帽者咸慕信側其帽焉

和子由木山引水二首

蜀江久不見滄浪江上枯槎遠可將去國尚能三犢載

汲泉何愛一夫忙，崎嶇好事入應笑。冷淡為歡意自長，
遙想納涼清夜永。牕前微月照汪汪。

千年古木臥無梢，浪卷沙翻去似瓢。幾度過秋生蘚暈，
至今流潤應江潮。泣然疑有蛟龍吐，斷處人言霹靂焦。
材大古來無適用，不須鬱鬱慕山苗。

王注：江有潮來，枯木先潤，若相應也。柳宗元《霹靂琴贊》
引始枯桐生石上，言有蛟龍伏其窟，一夕暴震為火焚。
至旦乃已，超道人取以為三琴。云杜子美詩：志士幽人
莫怨嗟，古來材大難為用。左思《詠史詩》：鬱鬱澗底松，離
離山上苗。以彼徑寸莖，蔭此百尺條。

寄題興州鼉太守新開古東池

百畝新池傍郭斜，居人行樂路人誇。
自言官長如靈運，能使江山似永嘉。
縱飲座中遺白蛤，音蛤幽尋盡處見桃

花不堪。山鳥號歸去，長遣王孫苦憶家。

南史謝靈運為永嘉太守，郡有各山水，素所愛好，遂肆志遨遊，尋山陟嶺，必造幽勝。嵩嶂千里，莫不遍歷。所至輒為詩，以致其意。永嘉今溫州也。貫休詩：永嘉為郡後，山水添鮮碧。永嘉志：本漢東甌縣。晉太康二年，明帝立永嘉郡。王注：蛤帽也。魏初有白蛤之製。

華陰寄子由

三年無日不思歸夢裏還家旋覺非
臘酒送寒催去國
東風吹雪滿征衣
三峰已過天浮翠
四扇行看日照扉
里堠消磨不禁盡
速攜家餉勞驂駢

華山記其上有三峰直上晴霽可觀
三峰蓮華松檜毛
女也韓退之詩荆山已去華山來
日出潼關四扇開
又
路傍堠詩堆堆路傍堠
一雙復一隻注封堠也

和董傳留別

王注董傳字至和洛陽人有詩名
嘗在鳳翔與東坡相從韓魏公鎮

長安傳有詩云古來風義遺才少
近世公卿薦士稀韓舉而已卒矣

麤繒大布裹生涯
腹有詩書氣自華
厭伴老儒烹瓠葉

強隨舉子踏槐花囊空不辨尋春馬眼亂行看擇壻車
得意猶堪誇世俗詔黃新濕字如鴉

後漢劉昆教授弟子恒五百餘人每春秋享射常備列
典儀以素木瓠葉為俎豆詩小雅幡幡瓠葉采之亨之
序曰刺幽王棄禮而不能行故思古之人不以微薄廢
禮焉南部新書長安舉士六月後落第者不出京謂之
過夏時語曰槐花黃舉子忙王注唐進士開宴常寄曲
江亭其日公卿家傾城縱觀鈿車珠鞅擲比而至中東
榻之選十八九盧仝詩閑來案
上翻墨汁塗抹詩書如老鴉

次韻柳子玉見寄

薄雷輕雨曉晴初陌上春泥未濺裾行樂及時雖有酒

出門無侶謾看書遙知寒食催歸騎定把鷓夷載後車
他日見邀須強起不應辭病似相如

漢書陳遵傳鷓夷滑稽腹如大壺注鷓夷韋囊以盛酒
即今鷓夷勝也史記司馬相如傳相如與臨邛令王吉
相善臨邛富人相謂曰令有貴客為具召之并召令相
如謝病不能行臨邛令不敢嘗食自往迎相如相如不
得已強往一座盡傾

送曾子固倅越得燕字

王注子固名鞏南豐人
嘉祐二年永叔知貢舉

子固兄弟四
人同登科

醉翁門下士雜沓難為賢曾子獨超軼孤芳陋羣妍昔

從南方來與翁兩聯翮翁今自憔悴子去亦宜然賈誼窮適楚樂生老思燕那因江鱠美遽厭天庖糲但苦世論隘聒耳如蜩蟬安得萬頃池養此橫海鱣

漢書劉向傳雜沓衆賢固不肅和賈誼傳天子議以誼任公卿之位絳灌之屬皆害之出為長沙太傅長沙楚地也史記樂毅傳毅去燕奔趙燕王以其子閒為昌國君而毅往來復通燕賈誼吊屈原賦橫江湖之鱣鯨今固將制於螻蟻李白詩魯國一杯水難容橫海鱣王注先生詩索云送曹鞏詩以譏近來多用刻薄之人議論鄙隘如蟬之鳴不足聽也以詩案考之此詩作於熙寧三年不當入此

王頤赴建州錢監求詩及草書

我昔識子自武功寒廳夜語尊酒同酒闌燭盡語不盡
倦僕立寐僵屏風丁寧勸學不死訣自言親受方瞳翁
嗟子聞道不早悟醉夢顛倒隨盲聾邇來憂患苦摧剝
意思蕭索如霜蓬羨君顏色愈少壯外慕漸少由中充
河車挽水灌腦黑丹砂伏火入頰紅大梁相逢又東去
但道何日辭樊籠未能便乞勾漏

集作峒
樓誤

令官曹似是

錫與銅留詩河上慰離別草書未暇緣怱怱

一作
念念

漢地理志武功縣屬右扶風韓退之答張徹詩勤來得
晤語勿憚宿寒廳漢書陳萬年病名其子咸教戒於牀

下語至夜半咸睡頭觸屏風南史陶弘景年踰八十而有壯容仙書云眼方者壽千歲弘景末年一眼有時而方人李根兩目腫子皆方仙經說八百歲人腫子方也黃庭經北方正氣名河車仙經云鈇絕河車空所作必無功河車挽水蓋搬運之法古篤子真訣大丹第六轉以文武火養一伏時成其伏火朱砂以楮汁九如麻子大每日下三九駐顏定色莊子內篇澤雉十步一啄百步一飲不蘄蓄乎樊中漢書地理志交趾郡屬縣有苟扁師古曰扁與漏同蓋即勾漏也一統志安南有勾漏山古縣在其下晉書葛洪聞交趾出丹砂求為勾漏令帝不許洪曰非欲求榮以有丹爾杜子美詩遠慚勾漏令不得問丹砂後漢書注張伯英下筆必為楷則號忿草書

秀州僧本瑩靜照堂

鳥囚不忘飛馬繫嘗念馳靜中不自勝不若聽所之君
看厭事人無事乃更悲貧賤苦形勞富貴嗟神疲作堂
名靜照此語子謂誰江湖隱淪士豈無適時資老死不
自惜扁舟自娛嬉從之恐莫見况肯從我為

史記陳軫謂犀首曰公何好飲也曰
無事也軫謂曰吾令公厭事可乎

石蒼舒醉墨堂

王注蒼舒京兆人字才美善行
草人謂得草聖三昧官為承事

郎通判保安庫嘗為丞相
呂公微仲所薦不達而卒

人生識字憂患始姓名麓記可以休何用草書誇神速

開卷懍怛令人愁我嘗好之每自笑君有此病何能瘳
自言其中有至樂適意無異逍遙遊近者作堂名醉墨
如飲美酒銷百憂乃知柳子語不妄病嗜土炭如珍羞
君於此藝亦云至堆牆敗筆如山丘興來一揮百紙盡
駿馬倏忽踏九州我書意造本無法點畫信手煩推求
胡為議論獨見假隻字片紙皆藏收不減鍾張君自足
下方羅趙我亦優不須臨池更苦學完取絹素充衾裯

杜子美詩子雲識字終投閣史記項籍學書不成其季
父梁怒之籍曰書足以記姓名而已杜醉歌行總角草

書又神速世上兒子徒紛紛張衡賦神憺恍以疑愁柳
子厚答崔黯書凡人好辭工書皆病癖也吾嘗見病心
腹人有啗土炭嗜酸鹹者不得則大戚觀吾子之意亦
戚矣國史補長沙僧懷素好草書棄筆堆積埋於山下
號曰筆塚南史曹景宗為人自恃高勝每作書字有不
解不以問人皆以意造懷素帖王右軍云吾真書過鍾
而草故不減張僕以為真不如鍾草不如張三輔決錄
杜伯度崔子玉以工草書稱於前世趙襲與羅暉亦以
能草頗自矜夸故張伯英與友人書曰上比崔杜不足
下方羅趙有餘後漢書注張芝字伯英好草書家之衣
帛必先書後染臨
池學書池水盡黑

送安惇秀才失解西歸

舊書不厭百回讀熟讀深思子自知他年名宦恐不免

今日棲遲那可追我昔家居斷還往著書不復窺園葵
竭來東遊慕人爵棄去舊學從兒嬉狂謀謬算百不遂
惟有霜鬢來如期故山松栢皆手種行且拱矣歸何時
萬事早知皆有命十年浪走寧非癡與君未可較得失
臨別惟有長嗟咨

晉董遇字季直華陰人興平中關中擾亂與兄仲耒耜
負販而常挾持經史人有從遇學者遇不甯教云必當
先讀百回讀書百遍而義自見漢書董仲舒孝景時為
博士下帷講誦蓋三年不窺園王注園葵用公儀子拔
去園葵事左傳秦穆公使孟明西乞白乙伐鄭蹇叔哭
之公曰爾何知中壽爾墓之木拱矣南史沈攸之言早

知窮達有命恨
不十年讀書

送任伋通判黃州兼寄其兄孜

王注孜時為簡州平泉令字師


聖伋字師中皆名士翁人也東坡謂之大任小任兄弟於慶歷間登第

吾州之豪任公子少年盛壯日千里無媒自進誰識之
有才不用今老矣別來十年學不厭讀破萬卷詩愈美
黃州小郡夾谿谷茆屋數家依竹葦知命無憂子何病
見賢不薦誰當恥平原老令更可悲六十青衫貧欲死
桐鄉遺老至今泣潁川大姓誰能箠因君寄聲問消息

莫對黃鶴矜爪觜

史記田光曰騏驎盛壯之時一日而馳千里至其衰老
驚馬先之杜子美詩讀書破萬卷下筆如有神漢書循
吏傳朱邑病且死屬其子曰我故為桐鄉吏其民愛我
必葬我桐鄉後世子孫奉嘗我不如桐鄉民李白詩六
帝餘古丘樵蘓泣遺老漢書趙廣漢傳潁川大姓原楮
宗族恣橫賓客犯為盜賊前二千石莫能禽制廣漢既
至數月誅原楮首惡郡中震慄韓退之詩魯連
細而黠有似黃鶴子田巴兀老蒼憐汝矜爪觜

施註蘓詩卷二



總校官庶吉士 臣張能照

校對官編修 臣楊壽楠

膳錄監生 臣戴堃

膳錄監生 臣邵士洙